

Turism e identità, debatic e golosariës, èrt, teater e musega fèsc viver l'Aisciuda Ladina

"L turism: na idea mia": na mostra de la Scola per conjobièr identità e turism

Dai 4 ai 8 de mé, en ocajon de l'Aisciuda Ladina, la Scola de Fascia porta dant da nef la mostra "L turism: na idea mia", esprescion de coche i studenc trentins veit, lec e interpretea l fenomen del turism, zis emportant per l'economia de noscia provinzia.

La mostra met dant i più bie e segnificatives elaborac rué ca da la idees e da la sensibilità di passa 470 studenc di 363 istituc trentins che à tout sù la endesfida trata acà 4 egn da l'Asat per prejentèr na idea de turism neva e joena, che aea vedù la Scola d'Èrt de Poza se vadagnèr l prum pest.

Metuda fora tel Cistiel del Buonconsiglio, tel Museo Ladin de Fascia e a Fai della Paganella, la mostra à abù l merit de envier via tel Trentin i prumes debatic e dialoghes anter categories economiche e mond de la scola e de la cultura. Dai lurieres di joegn l'è ciutà sù n model de svilup turistic che se poja sul raport anter teritorie e valores, ge dajan luster a la tradizion e ai prodoc gastronomici locai, ai simboi e a la usanze de la cultures de mendranza, metù de contra a la standardisazion de la ofertes turistiche locales.

Chest l spirit de la scomenzadiva

pissèda da la Sociazion Hotelieres, che à tirà l'atenzion de duc sul davegnir del setor turistic, recognoscian coche la cultura pel raprezentèr n emportant valor enjontà per l turism desche oportunità de desferenziacion teritorièla.

La Sorastanta de la Scola Ladina de Fascia Mirella Florian à consicrà de gran emportanza domanèr che la mostra vegne metuda fora tel chèder de la seconda edizion de la scomenzadiva "Aisciuda Ladina", ajache vegn stimà de gran enteress portèr inant n aprofondiment en cont di leames anter turism e



L lurier di studenc de l'ISA che aea vent l prum pest del concors.

cultura, sviluppan amò l debatit soscedà te la neva generaziions de studenc e joegn hotelieres.

En mèrtesc ai 4 de mé, da les 3

domesdi, alò da la senta de l'Apt de Poza, sarà l'inaudazion de la mostra a la prejenza de la autoritàdes.

Nicola Merli porta l'aisciuda a teater



Noemi Iori con Gianfranco Grisi e i sonadores tel spetàcol "L secret del lech de l'ercabuan".

Te anter la scomenzadives de la setemèna del lengaz ladin arà na bona lèrga ence l teater. Chest an l protagonist sarà l joen da Cianacei Nicola Merli, che dò aer studià e se aer "fat i osc" a Parigi, l se sproa ades a portèr sia pascion te noscia Val e ence te nosc lengaz.

En jebia ai 6 de mèrz al chino de Cianacei Nicola, ensema con l'ator catalan Joen Nebot Diez, portarà dant l spetàcol burlesch ladin-catalan dal titol "La Conferenza", co la regia de Aitor Basauri e la colaborazion artistica de Paolo Ibarluzea. Se trata de n spetàcol da grignèr olache Gino e Foggy, doi laureé honoris causa magna cum

laude te cultures de mendranza, porta dant i resultat de sia enrescides su la cultura ladina e catalèna. N viac mat, gustegol e fora da la realtà che rejona del raport anter doi popui dalonc, ma leé da l'amor per sia reijes, sia tera e sia tradiziions.

En vender ai 7 de mé l'artist fascian se metarà a la proa a l'hotel Valacia de Poza te n monologh desvalif e curious dal titol "Agridulce", olache l spevch protagonist palesa sie fort sentiment travers la paroles de Shakespeare per fascian. Nicola Merli sarà dapò protagonist, ensema con Noemi Iori, ence del spetàcol che serarà



Nicola Merli e Joen Nebot Diez te "La Conferenza".

sù la setemèna de l'Aisciuda Ladina la sabeda ai 8 da les 21.00 te auditorium de la Scola de Fascia. N spetàcol de musega e teater dal titol "L secret del lech de l'ercabuan", ispirà a la conties del Latemàr, con test de Fabio Chiochetti e museghes de Gianfranco Grisi. Prejentà per la pruma outa l'istà passà sun Gardècia con museghes per ladin e test per talian, l spetàcol vegnarà portà dant ades dut per fascian, spilenà apontin da Nicola Merli, con la cianties de la brava ciantarina Noemi Iori da Dèlba e museghes de Gianfranco Grisi portèdes dant da l'Ensamble "Nuema" de Mori.

Ladinhotel: scola e hotelieres che laora ensema

Ence chest an ponta via l'Aisciuda Ladina, na scomenzadiva che veit desche protagonisè l lengaz, la cultura e l'economia ladina. L Comprenjorie, en colaborazion co la Sociazion Joegn Hotelieres de Fascia, à volù binèr ensema i hotie ladin per creèr n "Club de prodot", che à l met de leèr l lengaz ladin e sia cultura al turism. Vigni alberch che tol pèrt a chest club, l "Ladinhotel", podarà esser recognosciù de gra a na tabela con n logo. Per creèr l logo l'è stat metù a jir n concors che à vedù desche protagonisè i scolees de la Scola d'Èrt de Poza, e che vegnarà giudiché da na comision formèda da cinch raprezentanc di enc organisadores del projet. N muie de scolees a tout sù con gaissa chesta scomenzadiva: alò de la mesura e de la scritta "Ladinhotel", fissèdes dantfora i studenc à prejentà passa 20 proponetes, fajan l dessegn con la



tecnica che i volea, e l'è stat ence studenc che à portà dant lurieres de grop. Duc i projec vegnarà metui dant te na mostra en vender ai 7 de mé, da mesa les set da sera, alò da l'Hotel Valacia de Poza, olache vegnarà ence fat la premiazion, con de bie pesc per i prumes trei lurieres.

Chesta l'è una de la scomenzadives leèdes a l'Aisciuda Ladina che à n obietif comun: chel de evidenzièr noscia identità ladina, che è unica te dut l mond. Duc i evenc de l'Aisciuda Ladina è publiché sul sit www.c11.tn.it o sui placac che se troa te APT. (an.giu.va)

CiocoLadin: la doucia saor de nosc lengaz

Anter la scomenzadives de chesta seconda edizion de l'Aisciuda Ladina, la più "gustegola" e originèla, apede a duta la golosariës che vegn enjignédes e sportes dai Joegn hotelieres de Fascia e a la sujestions di saores da zacan metui fora tel Museo Ladin, l'è de segur l "CiocoLadin".

L picol douc, te na confezion spezièla con i 3 colores de la bandiera ladina e l pèster de Fascia, e con ite na picola frasa per fascian, è stat pissà e realisà da la conditoria Reinhard da Vich: sarà chest l picol segn de benvegnù che i hotie che vel se califichèr col stempel de "LadinHotel" ge sporjarà a si ghesé.

L "CiocoLadin", te la doi verscions al lat e fondent a la gnapa, vegnarà prejentà en mèrcol ai 5 de

mé da les 6 da sera a l'Hotel Foresta a Moena e se podarà l cercèr ti dis de l'Aisciuda Ladina.

Se trata segur de na bela pissèda, che podarà amò se svilupèr per ge dèr l met ai ghesé che rua te Fascia de se portèr a cèsa na cercia de la doucia saor de nosc lengaz.



L ciastel de Reinhard à vent l prum pest

La fantasia e la capazità artistica de Reinhard Santifaller à vadagnà etres recognoscimenc foravia chisc dis passé co la partezipazion al concors "Ma che bel castello" endrezà delate de la seconda edizion de "Dulcis in Fondo", stata ai 24 e 25 de oril te la Val de Non. Na manifestazion dedichèda a l'artejanat del douc olache pasticeres e scoles podega tor pèrt con sia creaziions.

Chest an l tem de l'event l'era l

ciastel, en omaje a Cistiel Thun, che dò egn de restruturazion l'è stat endò avert al publich. Reinhard à tout pèrt al concors con na sia creazion de ciocolata e l'à vent l prum pest, ajache l'è stat valutà da la juria l più bel e originèl. N'autra bela sodesfazion per Reinhard, sia femena Antonella e per sia atività de conditoria.

